

# Inuutissarsiutinut ilinniartitaanermi pikkorissartitsisarnerit sulisitsisut inuutissarsiutinut ilinniartitaanermut akiliutaannit (AEB) aningaasalersorneqartut pillugit Namminersornerullutik Oqartussat nalunaarutaat

Sulisitsisut inuutissarsiutinut ilinniartitaanermut akiliutaat (AEB) pillugit Inatsisartut inatsisaanni nr. 16-imi, 23. november 1989-imeersumi § 8 naapertorlugu aalajangersarneqarput:

## Kapitali 1.

*Siunertaq nalinginnaasumillu aalajangersakkat.*

§ 1. Pikkorissartitsinernut tapiissuteqartarnerup siunertaraa sulisartut ilinniagallit ilinniagaqanngitsullu ilinniagaqaqqilluni ingerlaqqiffiusumillu pikkorissartitsinernut, suliffeqarnermi pisariaqartitat naapertorlugit inuussutissarsiorsinnaanermi piginnaassutsinik ataavartitsisuni, annertusaasuni pitsanngorsaasunilu peqataanissamut periarfissinneqarnissaat, taakkununga ilaallutik suliffissaaleqisut pisariaqartinneqartumik ilinniarteqqitaanissaat kiisalu suliffeqarnermi allanngortitsinermi sungiussiniarnermilu ajornartorsiutinik ikiersiinissaq.

§ 2. Pikkorissartitsinerit nalunaarut una malillugu tapiiffigineqarlutik ingerlanneqartut, inuussutissarsiutinut ilinniartinnit isumagineqassapput, taamaalilluni ilinniartinnit ilinniartitsissutigisartakkamik iluanni pikkorissartitsineq aqullugulu ingerlanniassammassuk.

*Imm. 2.* Pikkorissarnissat, suliamut atatillugu immikkoortut immikkut ittut iluanniittut, inuutissarsiutinullu ilinniartinnit isumagineqarsinnaanngitsut, inuutissarsiutinut ilinniartinnit inassuteqareerneratigit inuutissarsiutinut ilinniartinnit avataanni ingerlanneqarsinnaapput. Inuutissarsiutinut ilinniartinnit allaffissorneq pikkorissartussat pikkorissarneranni isumagissavaa.

*Imm. 3.* Imm. 1 aamma 2 naapertorlugu pikkorissarnerit tamanut ammasumik neqeroorutigineqassapput.

§ 3. Inuit ataasiakkaat pikkorissarnissaannut tapiissuteqartoqarsinnaavoq, pikkorissarnermut Kalaallit Nunaanni inuutissarsiutinut ilinniartinnit neqeroorutigineqanngitsunut. Inuutissarsiutinut ilinniartinnit imaluunniit Kultureqarnermut, Ilinniartitaanermut Ilageeqarnermullu Pisortaqarfiup tamatumunga piginnaatitaata, pikkorissarnermut pikkorissartussat peqataaneranni allaffissorneq isumagissavaat.

§ 4. Pikkorissartitsinerit nalunaarut una malillugu tapiiffigineqarlutik ingerlanneqartut, sapinngisaq naapertorlugu inissinneqartariaqarput sumiiffimmi, § 11 naapertorlugu angalanermi ilinniartinnit innermilu aningaasartuutit sapinngisamik annikitsuunissaat siunertaralugu.

§ 5. Tapiissuteqartoqarsinnaanngilaq AEB-mit tapiissutit assinginik, aningaasartuutinnik matussusiisinnaasunik, allamit tapiisoqarsinnaappat.

## Kapitali 2.

### *Tapiiffigineqarnissamut piumasaqaatit.*

**§ 6.** Pikkorissartitsinernut Kultureqarnermut, Ilinniartitaanermut Ilageeqarnermullu Pisorta qarfimmitt akuerineqartunut tapiissuteqartoqartarpoq.

*Imm. 2.* Tapiissutit AEB-mi aningaasat katersukkat sukkulluunniit uninngasuutinit tapiissuteqartoqartarpoq.

**§ 7.** § 2 naapertorlugu pikkorissarnernut minnerpaamik ullunik tallimanik sivilissuseqarlutik ullukku atuarnertut ingerlanneqartunut minnerpaamilu innut arfinilinnit peqataaffigineqartunut tapiissuteqartoqartarpoq. Taamaattoq pikkorissarnernut sivilinnerusumik ingerlanneqartunut sulinikkut isertitassanik annaasanut tapiissuteqartoqarsinnaavoq.

*Imm. 2.* § 3 naapertorlugu pikkorissarnernut minnerpaamik ullunik tallimanik sivilissuseqarlutik ullukku atuarnertut ingerlanneqartunut tapiissuteqartoqartarpoq.

*Imm. 3.* Kultureqarnermut, Ilinniartitaanermut Ilageeqarnermullu Pisorta qarfiup immikkut ittumik pissutissaqartillugu imm. 1-imi aalajangersakkat avaqqussinnaavai.

**§ 8.** Pikkorissartut tapiissutisinissaannut piumasaqaataavoq pineqartoq tassaassasoq

1) sulisitsisoq imaluunniit sulisitsisumi, sulisitsisut inuutissarsiutinut ilinniartitaanermut akiliutaat pillugu inatsisartut inatsisaanni § 1 naapertorlugu akiliuteqarnissaminut pisussaataasumi suliffeqartoq, imaluunniit

2) suliffissaaleqisoq kommunillu najugaqarfiup uppersarsarsinnaappagu, suliffissaaleqisup suliffittaarnissamut periarfissai pikkorissartitsinerup naammassereerneratigut annertuumik pitsanngoriaateqassasut.

*Imm. 2.* Pikkorissarnissanut peqataaniarluni nalunaarneq sulisitsisumit suliffissaaleqisunullu atatillugu kommunimit isumagineqassaaq.

*Imm. 3.* Imm. 1, nr. 1 naapertorlugu pikkorissartunut tapiiffiginnittoqarsinnaanngilaq pineqartup sulisitsisua AEB-mut akiliutinik akilernerqartussanngorsimasunik akiliinngitsoorsimappat.

Akilerartarnermi Pisorta qarfiup sulisitsisut AEB-mut akiligassaminnik kinguaattoorutaat pillugit paasissutissat ingerlateqqittassavai.

**§ 9.** Pikkorissartut 18-inik ukioqalereersimassapput, Kalaallit Nunaanni najugaqartuullutik pikkorissarnissamilu ilinniagaqarnikkut piumasaqaatitut aalajangersagaasunik eqquutsisimasariaqarlutik.

*Imm. 2.* Kultureqarnermut, Ilinniartitaanermut Ilageeqarnermullu Pisorta qarfiup imm. 1-imi ukiorisassatut piumasaqaataasoq immikkut illuinnartunik pissutissaqartillugu avaqqussinnaavaa.

**§ 10.** Pikkorissartup tapiissutisinnaatitaanera atorunnaassaaq, pineqartup pikkorissarneq maanaanaq unitsippagu. Taamaattoarli Kultureqarnermut, Ilinniartitaanermut Ilageeqarnermullu Pisorta qarfiup immikkut ittunik pisoqartillugu tamanna avaqqussinnaavaa, pikkorissarnermik unitsitsineq pikkorissartitsinermi pisorta q allakkatigut isumaqatigiissuteqarfigineqarsimappat.

## Kapitali 3.

### *Tapiissutit annertussusaat tunniunneqartarnerallu.*

**§ 11.** Pikkorissartunut tapiissutit tunniunneqarsinnaapput

1) sulinikkut isertitassanit annaasatut,

2) pikkorissarfimmut pikkorissarfimmiillu angalanernut aningaasartuutitut akiliutitut, taakkununga ilaallutik angalanerup nalaani akunnittariaqarnermi aningaasartuutit pisariaqartut, aamma

3) pikkorissarnerup nalaani ineqarnermut nerisaqarnermullu aningaasartuutitut akiliutitut.

*Imm. 2.* Imm. 1, nr. 1 naapertorlugu pikkorissartut sulinikkut isertitassanik annaasaat matussuserneqassapput, SIK-p aamma Kalaallit Nunaanni Naalakkersuisut ilinniagallit ilinniagaqarsimanngitsullu pillugit isumaqatigiissutaanni akissarsiat alloriarfianni 1-imi aningaasarsiap annertoqataanik. Taamaattorli pikkorissartunut 18-it inorlugit ukiulinnut § 9, imm. 2 naapertorlugu immikkut akuersissuteqarfigineqartunut tapiissuteqartoqassaaq SIK-p aamma Kalaallit Nunaanni Naalakkersuisut ilinniagaqanngitsunut 18-it inorlugit ukiulinnut tunngaviusunik aningaasarsiat pillugit isumaqatigiissutaasa assingannik.

*Imm. 3.* Taamaattorli imm. 1, nr. 1 atuutinnigilaq pikkorissartunut, pisortani suliffeqartunut.

**§ 12.** Ilitersuisut angalanerinit, ineqarnerinit nerisaqarnerinullu aningaasartuutit tamakkiisumik matussuserneqassapput.

*Imm. 2.* Ilitersuisut ullormusiaqartinneqassapput Kalaallit Nunaanni Danmarkimilu atorfimmut atatillugu angalanermit aningaasartuutitut allissutit matussuserneqartarnerat pillugu isumaqatigiissut sukkulluunniit atuuttoq naapertorlugu.

**§ 13.** Immikkut illuinnartunik pisoqartillugu Kultureqarnermut, Ilinniartitaanermut Ilageeqarnermullu Pisortaqarfup aningaasartuutitut §§ 11-12-mi eqqaaneqartunit allaanerusunut tapiisoqarnissaa akuersissutigisinnaavaa.

**§ 14.** Tapiissutit akiliutigineqartut feriarnersiutissarsiutigineqarsinnaanngillat.

**§ 15.** Tapiissutit tunniunneqassapput ullormit najukkamit aallarnermiit ullormut angerlamut apuunnermut. Tapiissutit sap. akunnerani annertunerpaamik ullunut arfinilinnut tunniunneqassapput.

*Imm. 2.* Pikkorissarfimmut pikkorissarfimmiillu angalaneq pikkorissarnermut atasumik pissaaq.

Peqataasussap piffissami allami angalanissani kissaatigippagu tapiissutit piffissami pikkorissarfiusumiinnaq tunniunneqassapput.

*Imm. 3.* Angalanerit aqqissuunneqassapput ataasiakkaanut tapiissutit tamarmiusut sapinngisamik ikinnerpaasussanngorlugit.

**§ 16.** Tapiissutit aningaasartuutitut akiliisumut sap. akunnikkuutaartumik kingumoortumik tunniunneqartassapput.

*Imm. 2.* Sulinikkut isertitassanik annaasat sulisitsisup aningaasartuutigissavai. Suliffissaaleqisunut sulinikkut isertitassanik annaasanut aningaasartuutit kommunimit akilerneqassapput.

#### **Kapitali 4.**

*Atortuulersitsinermik atorunnaarsitsinermillu aalajangersakkat.*

**§ 17.** Nalunaarut 1. juni 1998 atortuulersinneqarpoq.

*Imm. 2.* Ilutigalugu Inuutissarsiutinut ilinniartitaanermi pikkorissartitsisarnerit sulisitsisut inuutissarsiutinut ilinniartitaanermut akiliutaannit aningaasalersorneqartut pillugit Namminersornerullutik Oqartussat nalunaarutaat nr. 13, 26. maj 1995-imeersoqatorunnaarsinneqarpoq.

*Namminersornerullutik Oqartussat, ulloq 29. maj 1998.*

Konrad Steenholdt

/

Karl Kristian Olsen

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut